

VENDIM
Nr.191, datë 22.10.2010

**PËR MIRATIMIN E NDRYSHIMIT TË TË DHËNAVE TË PARAQITURA NË KËRKESËN PËR
MARRJE LICENCE NGA PERSONI FIZIK Z.ARDIAN DARDHA, LICENCUAR PËR
SUBJEKTIN TELEVIZIV PRIVAT KABLLOR “TV KABLLOR LUNA”**

Këshilli Kombëtar i Radios dhe Televizionit, i përbërë nga

Endira Bushati	Kryetare
Alban Karapici	Zëvendëskryetar
Suela Musta	Anëtare
Sami Neza	Anëtar
Gent Ibrahim	Anëtar
Zylyftar Bregu	Anëtar

Pasi mori në shqyrtim çështjen me:

Kërkues: z.Ardian Dardha

Objekt: Shqyrtim i kërkesës së paraqitur nga z.Ardian Dardha.

Baza ligjore: neni 7 pika 21, neni 22 dhe 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, i ndryshuar dhe ligji nr.8485, datë 12.5.1999 “Kodi i procedurave administrative të Republikës së Shqipërisë”,

VËREN SE:

Personi fizik z.Ardian Dardha është licencuar për operatorin televiziv privat kabllor “Tv kabllor Luna”, me vendimin nr.828, datë 24.4.2009, të KKRT-së. Me shkresën e datës 27.9.2010, subjekti person fizik Ardian Dardha ka paraqitur pranë KKRT-së kërkesën për ndryshimin e subjektit person fizik dhe kalimin e licencës në emër të subjektit z.Admir Leka.

Bashkëlidhur kërkesës, subjekti ka paraqitur certifikatën e regjistrimit të personit të tatueshëm, ekstraktin historik të regjistrimit tregtar, si dhe një deklaratë noteriale të datës 21.9.2010.

Sipas deklaratës noteriale:

“...z.Ardian Dardha, deklaroi se është pajisur me licencën nr.66, nga KKRT-ja, me emërtimin e “Tv kabllor Luna” dhe

z.Admir Leka, i regjistruar si person fizik pranë QKR-së Tiranë, me NIPT L 03301801 S, pas mbylljes së NIPT-it në QKR nga ana e z.Ardian Dardha.

Të dy të mësipërmit deklarojnë se do të jenë ortakë në aktivitetin sipas licencës së z.Ardian Dardha dhe do të punojnë me NIPT-in e z.Admir Leka ...”

Gjithashtu, sipas ekstraktit historik të datës 16.9.2010, vërtetohet se z.Admir Leka person fizik me fushë veprimtarie shpërndarje e sinjalit televiziv, është regjistruar në datën 1.9.2010. Vendi i ushtrimit të aktivitetit është Tiranë, Luz i Vogël, Vorrozen, ndërtesë 1-katëshe, pranë qendrës.

Në mbështetje të nenit 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar, sipas të cilit, për çdo ndryshim të të dhënave që janë paraqitur në kërkesën për marrjen e licencës i licencuari duhet të japë edhe arsyet përkatëse, personi fizik z.Ardian Dardha ka parashtruar si më poshtë vijon:

“Në kuadër të përmirësimit të cilësisë të ritransmetimeve, larmisë së programeve dhe ndryshimeve të pritshme teknologjike, e ndjeva të nevojshme të investoja shuma të konsiderueshme në funksionimin e televizionit kabllor “Luna”...

Sa më sipër, isha i detyruar të kërkoja bashkëpunimin me ortakë të tjerë dhe së bashku të përballonim shpenzimet e planifikuara. Ky bashkëpunim më detyron që së bashku me z.Admir Leka, banues në Gosë të Kavajës, të njohur prej meje edhe në veprimtari të tjera të investojmë për përballimin e shpenzimeve ...”.

Mbështetur në nenin 22 të ligjit 8410, datë 30.9.1998 “Për radion dhe televizionin publik e privat në Republikën e Shqipërisë”, I ndryshuar: “Licenca e transmetimit është e patjetërsueshme dhe vlen vetëm për subjektin të cilit i është dhënë. Në rast se mbajtësi i licencës hyn në marrëdhënie juridike civile, objekt i të cilave është veprimtaria radiotelevizive e licencuar, atëherë për cedimin ose kalimin e të drejtave që burojnë nga licenca kërkohet miratimi i Këshillit Kombëtar të Radios dhe Televizionit. Subjektit që ka

fituar këto të drejta miratimi i jepet në formën e një licence të re me të njëjtën përmbajtje. Kur Këshilli nuk e miraton kalimin për shkaqe të parashikuara në këtë ligj, i ofron frekuencat që i përkasin kësaj licence për një konkurrim të ri kandidaturash.”

PËR KËTO ARSYE,

Këshilli Kombëtar i Radios dhe Televizionit, në bazë të nenit 7 pika 21, nenit 22 dhe 30 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar

VENDOSI:

1. Të miratojë ndryshimet e të dhënave të paraqitura në kërkesën për marrjen e licencës nga z.Ardian Dardha, duke kaluar licencën për “Tv kabllor Luna”, në emër të personit fizik z.Admir Leka.
 2. T’i heqë subjektit fizik z.Ardian Dardha, licencën për televizionin privat kabllor “Tv kabllor Luna”.
 3. Licenca me nr.066 RTV kabllor, bëhet e pavlefshme.
 4. T’i japë subjektit person fizik Admir Leka, licencë me afat vlefshmërie sipas përcaktimit të bërë në licencën nr.066 RTV kabllor, duke e autorizuar të funksionojë si operator televiziv privat kabllor.
 5. Licenca e re ka të njëjtën përmbajtje me licencën nr.066 RTV kabllor, lidhur me kushtet e licencës, ku përfshihen struktura programore, zona e licencimit, kushtet teknike dhe tarifat.
 6. Ngarkohet administrata e KKRT-së për kryerjen e veprimeve të mëtejshme në zbatim të këtij vendimi.
- Ky vendim hyn në fuqi pas botimit në Fletoren Zyrtare.

KRYETARE
Endira Bushati